

Docente mas stima a dicidi na retira debi na inhusticianan

Colegio Arubano den crisis y alumnonan a declara guerra

ORANJESTAD (AAN): E siman aki a habri cu un noticia hopi desagradable, y cu a laga varios persona keda sorprendi. Esey ta ora cu e informe a circula, cu e conocido y tan stima docente di Colegio Arubano, esta Alfredo Capelo, a tuma retiro.

DIARIO a haya sa, cu esaki a bin debi na hopi disgusto tumando lugar na e school. Pa algun tempo caba, pa por yuda kita stress di alumnonan, na e asina yama "CARE Ruimte" pa alumnonan, ta pone musica toca cu volumen normal den pause.

Sin embargo directornan di Colegio Arubano e aña aki a cumenza haci dificil pa cu esaki, y fuentenan a splica cu a start discusion cu Capelo encuanto e asunto ey, y tambe encuanto e viahenan cu Colegio Arubano ta haci ultimo temponan.

DIARIO a compronde cu Directornan a tene discusion riba e.o., con e ta maneha e situacion financiero di viahenan aki. Tabata comosifuera Colegio Arubano kier elimina tur e cosnan ey.

A compronde cu e docente di matematica, Capelo, a expresa su mes contra tur esaki, y na final riba Dialuna a dicidi cu e no por mas, y a djis tuma su retiro.

E caso aki a cay manera un baño di awa friu pa tur alumno, y tambe su coleganan docente. Mas cu claro, riba Social Media un monton di reclamo, disgusto, y tambe apoyo moral a cumenza aparece pa Capelo.

E ta algo di compronde, como cu e alumnonan ta sinti cu Directornan di Colegio Arubano a haci algo cu ta purba di kibra nan. Hasta algun docente a cumenza expresa nan apoyo riba Social Media pa cu meneer Capelo.



Diripiente Rectorado a manda email pa tur docente, cu e menaza pa nan no comenta, ni bisa nada mas al respecto.

Tog alumnonan ta furioso riba Social Media. Semper nan ta mira e afdak y espacio conoci como "CARE-Ruimte" un lugar pa relaha nan mente. Pero Rectorado ta opina cu school no ta di e alumnonan, pues no por tin musica.

Den un entrevista cu algun docente, nan a bisa, cu e disgusto aki a start desde cu e Aña Escolar nobo aki a cumenza. Y e tabata notable inmediatamente. E Rector y Conrectornan a bin cu cantidad di regla nobo cu a pone presion enorme riba trabao di docentenan.

Un di e reglamentonan nobo cu a cay pisa, ta cu awor docentenan ta haya maximo di 8 dia pa controla trabao, envez di 10 dia. Tambe ta cumenza exigi di tur alumno y docente, pa papia Hulandes so riba e tereno di school. Hasta durante pause of ora liber. Gobierno di Aruba cu ta baloriza Papiamento, lo acep-

ta esaki?

Alumnonan no mag di bay bisti mas den short. No mag di usa ningun power outlet pa charge celular of tablet. Tampoco no kier bo scucha musica ni cu iPod, ni MP3-Player, ni cu bo Smartphone.

Docentenan na Colegio Arubano awor ta hasta sinti, cu Rectorado kier kita of elimina e organo di maestro ALV, y aki normalmente e docentenan tabatin un voz. Pero e Rectorado a bin cu regla pa pone mas presion riba e maestronan. Aña start cu hopi disgusto pa maestronan.

Loke docentenan ta disgusta cune, ta cu ningun rato Rector ni Conrectornan ta double check cu e docentenan prome, cu nan bin cu medida. Ni check feedback. Djis yega y impone reglanan estricto.

Ta parce cu Colegio Arubano tin Conrectornan hopi amarga. Diripiente tur cos ta negativo den nan wowo. Nan echt no ta mira nada positivo riba tereno di e school na Vondellaan. Y tur cos ta dictatorial tuma.

Berdad ta cu tin docente ta traha optimal, pero algun ta labora

malo. Pero si acaso tin docente ta traha malo, e ora mester papia cu nan. No por castiga full un school debi na algun docente cu ta traha malo.

Docentenan a keda babuca pa mira Capelo sali di reunion, nan a mire full disgusta, y ta zeur pa cos chikito.

Capelo ta un di e poco docentenan, cu añanan tras di otro, cu for di su mesun carter ta haci cosnan pa school. E no sa tuma liber, hasta riba dia di fiesta e ta riba tereno di school. Full e CARE-Ruimte na Colegio, ta Capelo mes a traha. E ta haci cosnan pa muchanan, cu semper ta na nan bienestar.

Aunke el a traha constantemente cos pa alumnonan, awor a sali na cla cu Rector y Conrectornan no ta aprecia loke Capelo ta haci. Pesey el a dicidi cu e no por mas traha asina, y a entrega su retiro riba Dialuna.

Awor cu el a tuma retiro, tabata bunita pa mira con alumnonan ta sostene. Docentenan cu hopi duele no por dune sosten riba Social Media, pasobra nan a haya menaza di Rectorado.

Ta increible cu Colegio Arubano a perde un docente, djis

debi cu tin hende amarga den Conrectornan, cu ta zeur pa cos kens. Mihor zeur pa cosnan importante, y no djis zeur pa musica.

Capelo no a merece di haya e trato aki. E ta un Amargura total di leiding cu reglanan nobo, y no djis bin impone medida. E momento a yega pa Rector cumenza tende di su docentenan tambe, pa haya un better picture.

E reaccion di mayornan tambe ta abrumador! Nan ta haya cu docentenan manera Capelo ta necesario, pa stimula alumnonan pa nan tin mas gana pa bay school tur mainta. Meneer Capelo lo traha te cu Diabierna, pa asina despedi di su alumnonan.

Tin indicacion cu un protesta ta ser planea pa tuma lugar awe Diamars 8 di September na Colegio Arubano mes, y ta pidi tur hende pa bin bisti na preto, of cu e Uniform blauw-scur. E ta bay ta un "Diamars Scur" na Colegio, y pa 7:25 am lo tin un protest riba e Plaza di School.

DIARIO a purba di haya contacto cu Meneer Capelo, pero e no tabata contesta su telefon.